

四庫全書

史部

欽定四庫全書

史部

通典卷一百六十五至
八

詳校官侍郎_臣李封

編修_臣程嘉謨覆勘

覆校官助教_臣吳省蘭

校對官學正_臣徐立綱

校對官助教_臣胡予襄

謄錄監生_臣于時和

謄錄貢生_臣苗序洙

欽定四庫全書

通典卷第一百六十五

唐 京兆杜佑 君卿纂

刑三

刑制下 大唐

大唐高祖起義至京師約法十二條唯制殺人劫盜背
軍叛逆者死餘並蠲除之及受禪又制五十三條格入
於新律武德七年頒行之至太宗即位制絞刑之屬五

十條免死斷右趾其後蜀王府法曹叅軍裴弘獻又駁律令不便者四十餘事太宗遂令刪改之除斷趾法加役流三十里居作二年比古死刑殆除其半據有司定律五百條分為十二卷於隋代舊律減大辟入流九十條減入徒者七十一條具寬恕篇又定令千五百九十條為三十卷貞觀十一年正月頒行之又刪武德貞觀以來勅格三千餘件定留七百條以為格十八卷國家程式雖則具存今所纂錄不可悉載取其朝夕要切簡易精詳則臨事不惑耳他皆類此七年十二月詔

三品以上犯公罪流私罪徒送問日不須追身高宗永
徽初又令長孫無忌等撰定格式舊制不便者皆隨有
無刪改遂分格為兩部曹司常務為留司格天下所共
者為散頒格四年有司撰律疏三十卷頒天下麟德二
年重定格式行之儀鳳二年又刪輯格式行之及文明
元年四月勅律令格式內外官人退食之暇各宜尋覽
仍以當司格令書於廳事之壁俯仰觀瞻庶免遺忘

貞觀

二年七月刑部侍郎韓回奏刑部掌律令刑名按覆大理及諸州應奏之事並無為諸司尋格式文比年諸司

每有予奪悉出檢頭下吏得以生姦法直因之輕重又先有勅當司格令並書廳事之壁此則百司皆合自有程式不惟刑部獨有典章訛弊日深事須改正勅旨宜委諸曹各以本司雜錢置所要律令格式其中要節仍准舊例錄郎官廳壁左右丞勾當事畢日奏其所請諸司於刑部檢事待本司寫格令等了日停

武太

后臨朝又令有司刪定格式加計帳及勾帳式通舊式成二十卷又以武德以來垂拱以前詔勅便於時者編為新格二卷太后自制序其二卷之外新編六卷堪為當司行用為垂拱留司格時韋方質詳練法理又委其事咸陽尉王守慎又有經治之才故垂拱格式識者稱

為詳密其律唯改二十四條神龍中又刪定垂拱格及

神龍元年以來制勅為散頒格皆七卷又刪補舊式為

二十卷頒於天下

景龍三年八月勅應酬功賞須依格式格式無文然始比倒其制勅不言

自今以後及永為常式者不得舉引為倒

景雲初又勅刪定格式令太極元

年二月奏上名太極格開元初玄宗又令刪定格式令

名為開元格又刪定律令名為開元後格至二十五年

又令刪緝舊格式律令及勅總七千四百八十條其千

三百四條於事非要並刪除之二千一百五十條隨文

損益三千五百九十四條仍舊不改總成律十二卷疏
三十卷令三十卷式二十卷開元新格十卷又格式律
令事類四十卷以類相從便於省覽二十五年九月奏
上之勅於尚書都省寫五十本發使散於天下畧件文

節要如後

開元十四年九月勅如間用例破勅及令式
深非道理自今以後不得更然二十五年九

月兵部尚書同中書門下三品李林甫奏今年五月
三十日以前制勅不入新格式者望並不在行用 ○

名例律曰笞刑五

自十至五十贖銅
從一斤至五斤

杖刑五

自六十至
百其贖銅

從六斤徒刑五

自一年至三年其贖
從二十斤至六十斤

流刑三

自二千里
至三千里

其贖從八十
斤至百斤
○十惡一曰謀反謂謀危社稷二曰謀大逆謂

毀宗廟山陵及宮闕三曰謀叛謂謀背國從偽四曰惡逆謂毆及謀殺祖父母父母殺伯叔父母姑兄姊外祖父母

夫及夫之祖父母父母五曰不道謂殺一家非死罪三人及支解人造

畜蠱毒魘魅六曰大不恭犯廟諱改為恭謂盜大祀神御之物乘輿服御物及偽造御寶合和

御藥誤不如本方及封題誤若造御膳誤犯食禁御幸舟船不牢固指斥乘輿情理切害及對捍制使而無人

臣之七曰不孝謂告言詛詈祖父母父母及祖父母父母禮之七曰不孝謂告言詛詈祖父母父母及祖父母父母

自嫁娶若作樂釋服從古聞祖父母父母死八曰不睦謂謀殺及

母喪匿不舉哀詐稱祖父母父母死八曰不睦謂謀殺及罵總麻以上親毆告夫及九曰不義謂謀殺本屬府主

大功以上尊長小功尊屬九曰不義謂謀殺本屬府主大

欽定四庫全書

卷一百六十五

師吏卒殺本部五品以上官長及聞夫喪匿不舉哀及作樂釋服從吉改嫁

十曰內亂

謂姦功

以上親父妾及與和者

○八議一曰議親

謂皇帝袒免以上親及太皇太后總麻以上親

皇后小功以上親

二曰議故

謂故舊

三曰議賢

謂大德

四曰議能

謂有

藝

五曰議功

謂有大功勲

六曰議貴

謂職事官三品以上及爵散官二品以上及爵

一品者

七曰議勤

謂有大勤勞

八曰議賓

謂承先代之後為國賓者諸八議

者犯死皆及應議之狀先奏請議議定奏裁

議者原情議罪稱定

刑之律而

不正決之流罪以下減一等其犯十惡者不用此律○

謀反及大逆者皆斬子年十六以上皆絞十五以下及

母女妻妾

子妻妾亦同

祖孫兄弟姊妹若部曲資財田宅並

沒官男夫年八十及篤疾婦人年六十及廢疾者並免

餘律應緣坐者准此

伯叔父母兄弟之子皆流三千里不限籍之

同異即雖謀反辭理不能動衆威力不足率人者亦皆

斬

謂結謀真實而不能為害者若自迷休徵假托靈異謬稱兵馬虛說反由傳惑衆人而無真狀可驗者自

從妖

法父子母女妻妾流三千里資財不在沒限其謀大

逆者絞諸口陳欲反之言心無真實之計而無狀可尋

者流二千里諸謀叛者絞已上道者皆絞

謂協同謀計乃坐被驅率

者非餘條被驅率准此

妻妾流二千里若率部衆百人以上父母

妻妾流三千里所率雖不滿百人以故為害者以百人

以上論

害為有所攻擊擄掠之者

即亡命山澤不從追喚者以謀叛

論其抗拒將吏者以上道論諸謀殺周親尊長外祖父

母夫夫之祖父母者皆斬

犯姦而姦人殺其夫所姦妻妾雖不知情與同罪

謀

殺總麻以上尊長者流二千里已傷者絞已殺者皆斬

即尊長謀殺卑幼者各依故殺減二等已傷減一等已

殺者依故殺法諸部曲奴婢謀殺主者皆斬謀殺主之

周親及外祖父母者絞已傷者皆斬諸妻妾謀殺故夫之祖父母父母者流二千里已傷者絞已殺者皆斬部

曲奴婢謀殺舊主者罪亦同

故夫謂夫亡改嫁舊主謂主放為良者餘舊條故夫

舊主准此諸告祖父母父母者絞

謂非緣坐之罪及謀叛以上而故告者下條准此

即嫡繼慈母殺其父及所養者殺其本生並聽告諸告

周親尊長外祖父母夫夫之祖父母雖得實徒二年其

告事重者減所告罪一等

所犯雖不合論告之者猶坐

即誣告重者

加所誣罪三等告大功尊長各減一等小功緦麻減二

等誣告重者各加所誣罪一等即非相容隱被告者論如律若告謀反逆叛者各不坐其相侵犯自理訴者聽

下條准此

○諸告總麻小功卑幼雖得實杖八十大功以上

遞減一等誣告重者周親減所誣罪二等大功減一等

小功以下以凡人論即誣告子孫外孫子孫之婦妾及

已之妾者各勿論○諸子孫違犯教令及供養有缺者

徒二年

謂可從而違堪供而缺者須祖父母父母告乃坐

諸部曲奴婢告主非

謀反逆叛者皆絞

被告者同首法

告主之周親及外祖父母者

流大功以下親徒一年誣告重者總麻加凡人一等小功遞加一等即奴婢訴良妾稱主壓者徒三年部曲減一等。諸同居若大功以下親及外祖父母外孫若孫之婦夫之兄弟及兄弟妻有罪相為隱部曲奴婢為主隱者皆勿論即漏露其事及摘語消息亦不坐其小功以下相隱減凡人一等若犯謀叛以上不用此律。諸居父母喪生子及兄弟別籍異財者徒一年。諸放部曲為良已給放書而壓為賤者徒二年若壓為部曲及

放奴婢為良而壓為賤者減一等各還正之。○諸同居卑幼私輒用財者一疋笞十十疋加一等罪止杖一百即同居應分不均平者計所侵坐贓論減三等。○諸居父母喪而嫁娶者徒三年妾減三等各離之知而共為婚姻者各減五等不知者不坐若居周喪而嫁娶者杖一百卑幼減二等妾不坐。○諸居父母喪與應嫁娶人主婚者杖一百。○諸謀殺人者徒三年已傷者絞已殺者斬從而加功者流三千里造意者雖不行仍為首人

催

殺者亦同即從者不行減行者一等餘條不行皆准此○諸以毒藥

藥人及賣者絞

謂堪以殺人者雖毒藥可以療病買者將與毒人皆絞賣者不知情不坐即

賣買而未用者流三千里脯肉有毒曾經病人有餘者

速焚之違者杖九十若故與人食並出賣令人病者徒

一年以故致死者絞即人自食致死者從過失殺人法

盜而食者不坐

○諸有所憎惡而造魘魅及造符書呪詛欲以

殺人者各以謀殺論減二等

於周親尊長及外祖父母夫之祖父母者各不減

以致死者各依本殺法欲病苦人者又減二等

即子孫於祖父

母父母部曲奴婢
於主者各不減

即於祖父母父母及主直求愛媚而

魘呪者流二千里若涉乘輿者皆斬○諸殘害死屍

謂焚

燒支解
之類

及棄屍水中者各減關殺罪一等

總麻以上尊長不減棄

而不失及髡髮若傷者各又減一等即子孫於祖父母

父母部曲奴婢於主者各不減

皆謂意在於惡者

○諸穿地得

死人不更埋及於墳墓燻狐狸而燒棺槨者徒二年燒

屍者徒三年總麻以上尊長各遞加一等卑幼各以凡

人遞減一等若子孫於祖父母父母部曲奴婢於主墓

燠狐狸者徒二年燒棺槨者流三千里燒屍者絞○諸

強盜

謂以威若力而取其財先強後盜先盜後強等若與人藥酒及食使狂亂取財亦是得闌遺之物毆

擊財主而不還及竊盜後覺棄財逃走財主追捕因相拒捍如此之類事有因緣者非強盜不得財

徒二年一足徒三年二足加一等十足及傷者絞殺人

者斬

殺傷奴婢亦同雖非財主但因盜殺傷者亦是

其持杖者雖不得財流三

千里五足者絞傷人者斬○諸竊盜不得財笞五十一

尺杖六十一足加一等五足徒一年五足加一等五十

足加役流○諸監臨者

若相主財物而監守自盜亦同

加凡盜二等三

十足絞

本條亦有加者累加之

○諸盜經斷後仍更行盜前後三

犯者流二千里犯流者絞

三盜止數赦後為主

其餘親屬相盜者

不用此律。○諸有事以財行求得枉法者坐贓論不得

枉法者減二等即同事共與者首則併贓論從者依已

分法。○諸監臨主守受財而枉法者一尺杖一百一足

加一等十五足絞不枉法者一尺杖九十一足加一等

至三十足加役流無祿者各減一等枉法者二十足絞

不枉法者四十足加役流。○諸監臨之官受所監臨之

物一尺笞四十一足加一等四足徒一年八足加一等

五十足流二千里與者減五等罪止杖一百乞取者加

一等强乞取者准枉法論○諸官人因使於使所受送

遺及乞取者與監臨同經過處取者減一等

糾彈之官不減

即

雖乞取者各與監臨罪同○諸貸所監臨財物者坐贓

論

受乞未上亦同餘條取受及相犯者准此

若百日不還以受所監臨財物

論强者各加二等

餘條强者准此

若賣買有賸利者計利以乞

取監臨財物論强市者笞五十有利者計利准枉法論

即斷契有數違負不還五十日者以受所監臨財物論
即借衣服器玩之屬經三十日不還者坐贓論罪止徒
一年○諸監臨之官私役所監臨及借奴婢牛馬駝騾
驢車船碾磑邸店之類各計傭賃以受所監臨財物論
即役使非供已者非供已謂流外官及雜任應供官事者計傭坐贓論罪

止杖一百其應供已驅使而收傭者罪亦如之供已求輸傭直

者不坐若有吉凶借使所監臨者不得過二十人不得過

五日其餘親屬雖過限及受遺乞貸皆勿論親屬謂總麻以上及

大功以上婚姻之屬餘條親屬准此

營公應借使者計傭賃坐贓論減二

等即因市易賸利及懸欠者亦如之○諸監臨之官受

猪羊供饋

謂非坐者

坐贓論强者依強取監臨財物法○諸

率斂所監臨財物饋送人雖不入已以受所監臨財物

論○諸監臨家人於所部有受乞借貸役使賣買有賸

利之屬各減官人罪二等官人知情與同罪不知情者

各減家人罪五等其在官非監臨及家人有犯者各減

監臨家人一等○諸去官而受舊官屬士庶饋與若乞

取借貸之屬各減在官時三等

謂家口未離本任所者

○諸因官

挾勢及豪強之人乞索者坐贓論減一等將送者為從

親故相與勿論

○諸監臨主守以官物私自貸若貸之人及貸

之者無文記以盜論

文記謂取抄署之類

立判案減二等即充公

解物若出付市易而私用者減一等坐之

雖貸推同餘條公解准此

即主守私貸無文記者依盜法

所貸之人不能備償者徵判署之官

下條

私借亦准此

○諸坐贓致罪者一尺笞二十一疋加一等十

疋徒一年罪止徒三年

謂非監臨主守而因事受財者

與者減五等○

諸人於他人地內得宿藏物隱而不送官者計合還主

之分坐贓論減三等

若得古器形制異而不送官者罪亦如之

○諸鬪毆人

者笞四十

謂以手足擊人者

傷及以他物毆人者杖六十

見傷為傷

非手足其餘皆為他物即兵不用刃亦是

傷及拔髮方寸以上杖八十若血

從耳目及內損吐血者各加二等○諸鬪毆人折齒毀

缺耳鼻眇人一目及折人手足指

眇謂虧損其目而猶見物

若破骨

及湯火傷人者徒一年折二指二齒以上及髡髮者徒

一年半○諸鬪毆以兵刃斫射人不著者杖一百

兵刃謂弓

箭刀稍予矜之屬即毆罪重者

若兵刃傷

謂金鐵無大小之限堪殺人者

及折人肋眇

人目墮人胎徒二年

墮胎者謂辜限內子死者乃坐

諸鬪毆折跌人肢

體及瞎其一目徒三年

折跌人肢體者謂其骨蹉跌失其常處

辜內平復

者各減二等

餘條損跌平復准此

及損二事以上及因舊患令至

篤疾若斷舌及毀敗人陰陽者流三千里○諸鬪毆殺

人者絞以刃故殺人者斬雖因鬪而用兵刃殺人者與

故殺同

謂人以兵刃逼已因用兵刃相殺傷者皆依鬪法餘條用兵刃准此

不因鬪故毆

傷人者加鬪毆傷人罪一等雖因鬪但絕時而殺傷者

從故殺傷法

謂忿競之後各以分散聲不相接去而復來是名絕時

○諸保辜者

手足毆傷人限十日以他物傷者二十日以刃傷者三

十日折跌肢體及破骨者五十日

毆傷不相須餘毆傷及殺傷各准此限

內死者各依殺人論其在限內及雖限內以他故死者

各依本鬪傷法

以他故謂別增餘患而死者

○諸同謀共毆傷人者

各以下手重者為重罪原謀減一等從者又減一等若

先下手重者餘各減二等至死者隨所因為重罪其不

同謀者各依所毆傷殺其事不可分者以後下手為重

罪若亂毀傷不知先後輕重者以謀首及初鬪者為重

罪餘各減二等○諸毆制使及本屬府主刺史縣令及

吏卒毆本部官長徒三年傷者流二千里折傷者絞折傷

謂折齒以上若毆六品以下官長各減二等減罪輕重加凡

鬪一等死者斬詈者各減毆罪三等須親自聞之乃成詈即毆佐

貳者徒一年傷重者加凡鬪傷一等死者斬○諸造妖

書及妖言者絞造謂自造休咎及鬼神之言妄說吉凶涉於不順傳用以惑衆

者亦如之用傳謂傳言謂用書其不滿衆者流三千里言理無害

者杖一百即私有妖書雖不用徒三年言理無害者杖六十○諸夜無故入人家內者笞四十主人登時格殺

之勿論若知非侵犯而殺傷者減鬪殺傷二等其就拘執而殺傷者以鬪殺傷論至死者加役流○諸盜官文

書印者徒二年餘印杖一百

謂貪利之而非行用者餘印謂印物及畜產者○

諸無官犯罪有官事發流罪以下以贖論

謂從流外及庶人而任流

內者不以官當除免十惡及五流者不用此律

卑官犯罪遷官事發在官犯罪

去官事發或事發去官犯公罪流以下各勿論餘罪論

如律有官犯罪無官事發有蔭犯罪無蔭事發無蔭犯

罪有蔭事發並從官蔭之法。諸犯私罪以官當徒者

私罪謂私自犯及對制詐不以實受贓枉法之類

五品以上一官當徒二年九

品以上一官當徒一年若犯公罪

公罪謂緣公事致罪而無私曲者

各

加一年當以官當流者三流同比徒四年其有二官

謂

事官散官衛官同為一官

先以高者當

若去官未叙准此例

次以勲官

當行守者各以本品當仍各解見任若有餘罪及更犯

者聽以歷任之官當

歷任謂降所不至者

其流內官而任流外職

犯罪以流內官當及贖徒一年者各解流外任。○諸流

配人在道赦計行程過限者不得以赦原

謂從上道日總計行程有

違者有故者不用此律若程內逃亡亦不在免限即逃者

身死所隨家口仍准上法聽還。○諸年七十以上十五

以下及廢疾犯流罪以下收贖

犯加役流反逆緣坐流及會赦猶流者不用此

律至配所免居作

八十以上十歲以下及篤疾犯反逆殺人應

死者上請盜及傷人者亦收贖

有官爵者各從官當除免死

餘皆勿

論九十以上七歲以下雖有死罪不加刑

緣坐應配沒者不用此律

即有人教令罪其教令者若有贓應備受贓者備之○

諸犯罪時雖未老疾而事發老疾者依老疾論若在徒年限內老疾者亦如之犯罪時幼小事發時長大依幼

小論○諸以贓入罪正贓見在者還官主

轉易得他物及生產蕃育

皆為見在

已費用者死及配流勿徵

別犯流及身死者同

餘皆徵之

盜者

倍備

若計傭賃為贓者勿徵諸平贓者皆據犯處當時物

價及上絹估平功傭者計人日為絹三疋牛馬駝騾驢車亦同船及碾磑列店之類亦依犯時價值傭賃雖多

各不得過其本價○諸犯罪未發而自首者原其罪

正賊

猶微如法其輕罪雖發因首重罪者免其重罪即因問所劾

之罪而別言餘罪者亦如之即遣人代首若於法得相

容隱者為首及相告言者各聽如罪人身自首法

緣坐之罪

及謀叛以上本服周親雖捕告俱同自首法

其聞首告被追不赴者不得原

罪謂止坐不赴者身

即自首不實及不盡者以不實不盡之罪

罪之至死者聽減一等

自首賊數不盡者止計不盡之賊科之

其知人欲

告及亡叛而自首者減罪二等坐之即亡叛者雖不自

首能還歸本所者亦同其於人損傷

因犯殺傷而自首者得免所因之罪

仍從故殺傷法本應過失者聽從本法

於物不可賠償

本物見在首即事者聽同免法

發逃亡

雖不得首所犯之罪俱減逃亡之坐

若越度關及姦

私度亦同姦謂犯良人

並私習天文者並不在自首之例。諸共犯罪者以造

意為首隨從者減一等若家人共犯止坐尊長

於法不坐者歸

罪於其次尊長為男夫

侵損於人者以凡人首從論即共監臨主

守為犯雖造意者仍以監守為首凡人以常從論。諸

二罪以上俱發以重者論

謂非應累者准重條其狀不累輕以加重若重應贖輕罪

應居作官當者以居作官當為重

等者從一若一罪先發已經論決餘

罪後發其輕若等勿論重者更論之通計前罪以充後

數即以贓致罪頻犯者並累科若罪法不等者以重贓

併滿輕贓各倍論

累謂上累見發之贓倍謂二尺為一尺不等謂以強盜枉法等贓併從竊

盜受所監臨之類即監臨主守因事受財而同事共與若一事類受及於所監守頻盜者累而不倍其一

事分為罪二罪法若等則累論罪法不等則以重法併

滿輕法

罪法等者謂若買易官物計其等准盜論計其利以盜論之類罪法不等者謂若詐請官器仗

以亡失併從毀傷以考校不實併從失不實之類

累併不加重者止從重論其

應除免倍沒備償罪止者各盡本法○諸脫戶者家長

徒三年無課役者減二等女戶又減三等

謂戶俱不附貫若不由家

長罪其所由即見在使任者雖脫戶及計口多者各從漏口法

脫口及增減年狀

謂老疾中

小之以免課役一口徒一年二口加一等罪止徒三年

其增減等非免課役及漏無課役口者四口為一口罪

止徒一年半即不滿四口杖六十

部曲奴婢亦同

○諸祖父母

父母在而子孫別籍異財者徒三年

別籍異財不相須下條准此

若

祖父母父母令別籍及以子孫妄繼人後者徒二年子

孫不坐○諸擅發兵十人以上徒一年百人徒一年半

二百人加一等千人絞

謂無警急又不先言上而輒發兵者雖即言上而不待報猶為

擅發文書未行即不坐

給與者隨所給人數減擅發一等

亦謂不先言上

待報者告令發遣即坐

其寇賊卒來欲有攻襲即城屯反叛若賊

有內應急須兵者得便調發雖有所屬比部官司亦得

調發給與即言上

各謂急須兵不容得先言上者

若不即調發及不即

給與者准所須人數並與擅發罪同其不即言上者亦

准發人數減罪一等若有逃亡盜賊權差人夫足以追

捕者不用此律。○諸主將守城為賊所攻不固守而棄去及守備不設為賊所掩覆者斬。若連接寇賊被遣斥候不覺賊來者徒三年。以故致有覆敗亦斬。○諸主將以下臨陣先退若寇賊對陣捨仗投軍及棄賊來降而輒殺者斬。即違犯軍令軍還以後在律有條者依律斷。無條者勿論。○諸私有禁兵器者徒一年半。謂非弓箭刀盾短矛者弩一張加二等。甲一領及弩三張流二千里。甲三領弩五張絞私造者各加一等。甲謂皮鐵等具裝與甲同即得闌遺過三十日不送

官者同
私有法

造未成者減二等即私有甲弩非全成者杖一

百餘非全成者勿論○諸告人罪非叛以上者皆令三

審應受辭牒官司並具曉示并得叛坐之情每審皆別

日受辭

若使人在路不得留待別
日受辭者聽當日三審

官人於審後判記審

訖然後付司若事有切害者不在此例

切害謂殺人賊
盜逃亡與強姦

良人及更有
急速之類

不解書者典為書之前人合禁告人亦禁

辯定放之即鄰伍告者有死罪流告人散禁流以下責

保叅對誣告人者各反坐即糾彈之官挾私彈事不實

亦如之

反坐致罪准前人入罪法至死而前人未決者聽減一等其本應加杖及贖者止依杖贖法則

誣告官人及有陰者依常律

若告二事以上重事實及數罪等但一

事實除其罪重事虛反其所贖即罪至所止者所誣雖

多不反坐其告二人以上雖實者多猶以虛者反坐

謂告

二人以上但一人不實罪雖輕反其坐

若上表告人已經聞奏事有不實

反坐罪輕者從上書詐不實論○諸誣告本屬府主刺

史縣令者加所誣罪二等○諸投匿名書告人罪者流

二千里

謂匿姓名及假人姓名以避已告者棄置懸之俱是

得見者皆即焚之若

將送官司者徒一年官司受而為理者加二等被告者
不坐輒上聞者徒三年○諸以赦前事相告言者以其
罪罪之官司受而為理者以故入人罪論至死者各加

役流若事須追究者不用此律

追究謂婚姻良賤赦限
外蔽匿應改正徵收及

追見賊
之類

諸被囚禁不得告舉他事其獄官酷已者聽之

即年八十以上十歲以下及篤疾者聽告謀反逆叛子
孫不孝及同居之內為人侵犯者餘並不得告官司受
而為理者各減所理罪三等○上元元年十二月刑部

奏准名例律法云獄成謂賊狀露驗及尚書省斷訖未
奏疏云賊謂所犯之賊見獲本物狀謂殺人之類得狀
為驗雖在州縣並為獄成尚書省斷訖未奏者謂刑部
覆訖未奏亦為獄成今法官商量若款自承伏已經聞
奏及有勅付法刑名更無可移者謂同獄成臣今與法
官審加論議仍永為恒式勅旨依二年六月刑部奏謹
按五刑笞杖徒流死是也今准勅除削絞死罪准有四
刑每有思慮須降死刑不免還斬絞勅律互用法理難

容又應決重杖之人令式先無分析京城知是蠹害決殺者多死外州見流嶺南決不至死決有兩種法開二門勅旨斬絞刑宜依格律處分寶應元年九月刑部大理奏准式制勅處分與一頓杖者決四十至到與一頓及重杖一頓並決六十無文至死者為準式處分又制勅或有令決痛杖一頓者式文既不載杖數請准至到與一頓決六十並不至死勅旨依建中三年八月刑部侍郎班宏奏其十惡中惡逆以上四等罪請准律用刑

其餘各犯別罪應合處斬刑自今以後並請決重杖一頓處死以代極法重杖既是死刑諸司使不在奏請決重杖限勅旨依○原夫先王之制刑也本於愛人求理非徒害人作威往古朴淳事簡刑省唐虞及三代刑制其畧可知令主則輕虐后遂重於善也則云罰不及嗣其不善也乃云罪人以族斯則前賢臧否之辨歟秦法苛峻天下潰叛漢祖蠲除約定三章大辟之罪猶誅三族孝文雖罷肉刑新垣亦罹斯酷其後顏異陷反唇棄

市楊惲坐諷譏腰斬泊乎曹馬經綸之際忤者三族皆夷後魏有門房之誅歷代蓋治時少罕遇輕刑亂時多常遭重典國家子育萬姓輕簡刑章徵之前代未有其比所以幽陵之盜西軼犬戎之寇東侵京師傾陷皇輿巡狩億兆戮力大慙旋殲自海內興戎今以累紀征繕未減杼柚屢空烝庶無離怨心者是由刑輕之故或曰荀卿有言代治則刑重代亂則刑輕所以治者乃刑重所以亂者乃刑輕欲求至治必用重典斯乃一端偏見諒非適時通論也

夫刑之輕重利害已粗言之矣夫刑者成也一成而不可變故君子盡心焉謂之君子則曰賢人欲求賢人固不易得矧天下數百千郡縣豈得衆多君子乎佑以為條章繁難而決斷必不及條章輕簡而決斷或時漏故老氏云其政悶悶其人淳淳政教寬大悶昧似若不明則人淳然而質朴其政察察其人缺缺政教苛察人則應之缺缺然而凋弊又語曰寧失不經仁惻之旨也

通典卷一百六十五

欽定四庫全書

通典卷一百六十六

唐 京兆杜佑君卿纂

刑四

雜議上

虞

周

秦

漢

後漢

晉

東晉

虞書云帝謂皋陶汝作士明于五刑以弼五教期于予

治

弼輔期當也歎其能以刑輔教當於治體

刑期于無刑民協于中時乃功

懋哉

雖或行刑以殺止殺終無犯者刑期無所刑民皆合於大中是汝之功勉之

○周制以

八辟麗邦法附刑罰

辟法也麗附也易曰日月麗乎天

一曰議親之辟

若今宗室有罪先請是也

二曰議故

故舊不遺則民不偷

三曰議賢

若今廉吏有罪先請

是也賢謂有德行者

四曰議能

能謂有道藝者傳曰夫謀而鮮過惠訓不倦者叔向有焉社稷之固

也宥之以勸能者

五曰議功

謂有大勲勞立功者

六曰議貴

若今吏墨綬者有罪先請

是也七曰議勤

謂憔悴以事國

八曰議賓

謂所不臣者三恪二代之後

以兩造

禁民訟入束矢於朝然後聽之

爭財曰訟兩至使入束矢乃治之也不至不入

束矢則是自服不直者也曰其直如矢古者一弓百矢

禮記曰刑人不在君側公

族有死罪即磬於甸人

不於市朝者隱之也甸人掌郊野之官懸縊殺之曰磬

而

無宮刑其刑罪即織劓亦告於甸人

織讀曰織織刺也劓割也宮以刀鋸

割刺之告讀曰鞠

刑肅而俗弊則人不歸也刑人於市與衆棄

之又考禮正刑一德以尊天子大戴禮曰刑罰者御人之銜勒也吏者轡也刑者筴也天子御者內史太史左右手也古者以法為銜勒以官為轡以刑為筴以人為手而御天下公家不畜刑人大夫不養士遇之途不與言也屏諸四方唯其所之不及以政不欲生之故也又曰刑不上大夫者古之大夫有坐不廉污穢者則曰簠

簋不飭淫亂男女無別者則曰帷薄不修罔上不忠者則曰臣節未著罷軟不勝任者則曰下官不職干國之紀者則曰行事不請此五者大夫定罪名矣不忍斥然正以呼之是故大夫之罪其在五刑之域者聞有謹何則白冠黿纓盤水加劍造乎闕而自請罪君不使有司執縛牽而加之也其有大罪者聞命則北面跪而自裁君不使人捽引而刑殺之也

捽才忽反

曰子大夫自取之耳

吾遇子有禮矣是曰刑不上大夫東周之季王道寢壞

教化不行子產相鄭而鑄刑書

鑄刑法於鼎

晉叔向非之曰

遺其書以非之

昔先王議事以制不為刑辟

李奇曰先議其犯事議定乃斷其罪

不為一成之刑著於鼎也顏師古曰虞舜則象以典刑流宥五刑周禮則三典五刑以詰邦國非不預設但不

宣露使人知之

懼民之有爭心也猶不可禁禦是故閑之以誼

糾之以政

閑防也糾舉也

行之以禮守之以信奉之以仁

奉養也

制為祿位以勸其從

勸其從教之心也

嚴斷刑罰以威其淫

淫放

也懼其未也故誨之以忠聳之以行教之以務使之以

和臨之以敬泣之以彊斷之以剛猶求聖哲之上明察

之官忠信之長慈惠之師民於是乎可任使也而不生

禍亂民知有辟則不忌於上並有爭心以徵於書而徵

幸以成之弗可為矣

辟法也為治也權移於法故人不畏上因危文生詐妄徵幸而成巧

則弗可治也

今吾子制參辟鑄刑書

孟康曰謂夏殷周亂政以制三辟也將以

靖民不亦難乎

師古曰靖安也一曰治也

民知爭端矣將棄禮而徵

於書

取證於刑書

錐刀之末將盡爭之

喻微細

亂獄滋豐賄賂

並行

滋益也

終子之世鄭其敗乎子產報曰若吾子之言

僑不材不能及子孫吾以救世也

言雖非長久之法且救當時之弊

○

議曰古來述作鮮克無累或其識未至精或其言未至公觀左氏之紀叔向書也蓋多其義而表其詞孟堅從而善之似不敢異於前志豈其識或未精乎按虞舜立

法曰象以典刑流宥五刑鞭作官刑扑作教刑金作贖

刑眚災肆赦怙終賊刑欽哉欽哉惟刑之恤哉

孔安國注曰陳

典刑之義勅天下敬之憂不得其中

又按周官司寇建三典正月之吉懸

於象魏使萬人觀之浹旬而斂漢宣帝患決獄失中置廷尉平時鄭昌上疏曰聖王立法明刑者救衰亂之起

也今宜刪定律令愚人知所避姦吏無所弄後之論者即云上古議事不為刑辟夫有血氣必有爭心羣居勝物之始三皇無為之代既有君長焉則有刑罰焉其俗至淳其事至簡人犯者至少何必先定刑名所以因事立制叔向之言可矣自五帝以降法教益繁虞舜聖哲之君後賢祖述其道刑章輕重亦以素設周氏三典懸諸象魏皆以防民陷令避罪辜是故鄭昌獻疏蓋以發明其義當子產相鄭在東周衰時王室已卑諸侯力政

區區鄭國介於晉楚法弛民怠政墮俗微觀時之宜設
救之術外抗大國內安疲氓仲尼兄事聞死出涕稱之
遺愛非盛德歟而叔向乃謂赫胥栗陸御宇之時徒陳
閑誼行禮致治之說雖虞夏之盛亦未可在殷周之初
固不及研尋反覆斯言諒同玉卮無當矣詳左氏之傳
或匪至公晏嬰張趯譏議則別先儒註釋亦已昌言所
紀叔向此書有如曲護晏子也或曰按孔穎達正義云
子產鑄刑書而叔向責之趙鞅鑄刑鼎而仲尼譏之則

刑之輕重不可使人知也聖王雖制刑法舉其大綱但共犯一法情有深淺待至臨事議其輕重也按孔議附會叔向言前已論之矣又按左傳晉趙鞅鑄刑鼎著范宣子所為刑書焉仲尼曰晉國將守唐叔之所受法度以經緯其民文公又為被廬之法以為盟主今棄是度也而為刑鼎民在鼎矣何以尊貴

棄禮徵書故不尊貴

且宣子之

刑夷之蒐晉國之亂制也又議曰夫經籍指歸誠要疏議固當解釋本文豈可徒為臆說詳左氏載夫子所議

令守晉國舊法范宣子所為非善政也故錄本傳以證之佑誠惜學輒議前賢儻遇精鑒達識庶幾要終原始幸詳鄙見○秦孝公納衛鞅言欲變法恐天下議已衛鞅曰疑行無名疑事無成且夫有高人之行者固見非於世有獨知之慮者必見傲於人愚者闇於成事智者見於未萌民不可與慮始而可與樂成論至德者不和於俗成大功者不謀於衆是以聖人苟可以強國不法其故苟可以利人不循其禮孝公曰善甘龍曰不然聖

人不易民而教智者不變法而治因人立教不勞而成
功緣法而治者吏習而人安衛鞅曰龍之所言時俗之
言也常人安於習俗學者溺於所聞以此兩者居官守
法可也非所與論於法之外也三代不同禮而王五伯
不同法而霸智者作法愚者制焉賢者更禮不肖者拘
焉杜摯曰利不百不變法功不十不易業法古無過循
禮不邪衛鞅曰治代不一道便國不必古故湯武不循
古而王夏殷不易禮而亡反古者不可非而循禮者不

足多孝公竟變法令○漢景帝時廷尉上囚防年繼母
陳論殺防年父防年殺陳依律殺母以大逆論帝疑之
武帝時年十二為太子在旁帝遂問之太子答曰夫繼
母如母明不及母緣父之故比之於母今繼母無狀手
殺其父則下手之日母恩絕矣宜與殺人者同不宜與
大逆論從之宣帝自在閭閻知刑法不一於是置廷尉
平秩六百石員四人選于定國為廷尉黃霸等為廷平
獄刑號為平矣時鄭昌上疏曰聖王立法明刑者非以

為治拯哀亂之起也今明主躬垂明聽雖不置廷尉平獄將自正若開後嗣不若刪定律令律令一定愚人知所避姦吏無所弄矣今不正其本而置廷平以治其末政哀聽倦則廷平招權為亂首矣薛宣為丞相時弟循為臨菑令後母常隨循居官宣迎後母循不遣後母病死循去官持服宣謂循三年服少能行之者兄弟相駁不可

駁者執意不同猶如色之間雜

循遂竟服繇是兄弟不和後免丞

相加特進久之哀帝即位博士申咸給事中亦東海人

毀宣不供養行喪服薄於骨肉前以不忠孝免不宜復

封列侯在朝省宣子況為右曹侍郎數聞其語賅客楊

明欽令創咸面目使不居位

創為傷之

會司隸缺況恐咸為

之遂令明欽遮斫咸宮門外斷鼻唇身八創事下有司

議御史中丞衆等議

史失衆姓

奏曰況朝臣父故宰相封列

侯不相勅承教化而骨肉相疑咸受循言以謗毀宣咸

所言皆宣行迹衆人所共見公家所宜聞況知咸給事

中恐為司隸舉奏宣而公令明欽迫切宮闕要遮創戮

近臣於大道人衆中欲以高塞聰明杜絕論議之端

隔與

隔同杜塞也

桀黠無所畏忌萬衆謹譁流聞四方不與凡人

忿怒爭鬪同臣聞敬近臣為近主也禮下公門式路馬

過公門則下車見路馬則撫式蓋崇敬也式車前橫木

居處畜產且猶敬之春秋

之義意惡功遂不免於誅

遂成也言舉意不善雖成功猶加誅

上浸之源

不可長也

浸近也傷戮大臣有所逼近也浸亦作侵犯也其義兩通長竹兩反

況首為惡

明手傷功意俱惡

手傷人為功使人傷人為意

皆大不敬明當以重

論及況皆棄市廷尉直駁議曰律曰以刃傷人完為城

且春其賊加罪一等與謀者同罪詔書無詆欺成罪

詆毀

也丁禮反

傳曰遇人不以禮而見疾者與疾人之罪鈞惡不

直也

以杖手毆擊破其皮腫起青黑而無創瘢者律謂之瘀痛遇人不以義為不直雖見毆罪同毆也瘀

音紙痛音鮪

咸厚善循而數稱宣過惡流聞不可謂直

言咸為循

而毀宣是不義而不正

況以故謀傷咸謀計已定後聞置司隸因

前謀而趣明

趣讀曰促

非以恐咸為司隸故造謀也本爭私

變雖於掖門外傷咸道中與凡人爭鬪無異殺人者死傷人者刑古今之通道三代所不易也孔子曰必也正

名乎名不正則言不順至於刑罰不中而人無所措其

手足

措置也

今以況為首惡明手傷為大不敬公私無差

春秋之義原心定罪

原謂尋其本

原況以父見謗發忿怒無

他大惡加誣欺輯

音集

小過成大辟陷死刑違明詔恐非

法意不可施行聖王不以怒增刑明當以賊傷人不直

以受其財

況與謀者皆爵減完為城旦

以其身有爵級故得減罪而為完也況身

及同謀者皆從此科

帝以問公卿丞相孔光大司空師丹以中丞

議是自將軍以下至博士議郎皆是廷尉況竟減死罪

一等徙燉煌宣坐免為庶人歸故鄉定陵侯淳于長坐

大逆誅長小妻乃始等六人皆以事未發覺時棄或更

嫁及長事發丞相方進大司空何武議曰令犯法者各

以發時律令論之

此其引令條之文也發謂其犯法之時也

明有所記也

記志

長犯大逆時乃始等見為妻已有當坐之罪與身犯法

無異後乃棄去於法無以解

解免也

請論廷尉孔光駁議

以為大逆無道父母妻子同產無少長皆棄市欲懲後

犯法者也

懲創止也

夫婦之道有義則合無義則離長自未

知當罪大逆之法而乃始等棄去或更嫁義已絕而欲
以為長妻論殺之名不正不當坐有詔光議是○班固
曰自昭宣元成哀平六代之間斷獄殊死率歲千餘口

而一人

率天下犯罪者千而有一人死

耐罪上至右趾三倍有餘

從耐罪以

上至右趾千口三人刑

古人有言滿堂飲酒有一人向隅而泣則

一堂不樂王者之於天下猶一堂之上也故一人不得
其平為之悽愴今郡國被刑或冤死者多此和氣所以
未洽者也原夫獄刑所以蕃者書云伯夷降典折民惟

刑

言伯夷下禮法以導人習知禮然後用刑也

言禮制以止刑猶隄之防溢

水也今隄防凌遲禮制未立死刑過制生刑易犯饑寒

並至窮斯濫濫豪強擅私為之囊橐

言容隱姦邪若囊橐盛物

姦有

所隱則狃而寢廣矣

狃詐習也寢漸也狃音女九反

孔子曰古之知法

者能省刑本也今之知法者不失有罪末也

省謂減除之絕於未

然故曰本也不失其罪事止聽訟所以為未

又曰今之聽獄者求所以殺之

古之聽獄者求所以生之與其殺不辜寧失有罪今之

獄吏上下相驅以刻為明深者獲公名平者多後患諺

曰鬻棺者欲歲之疫非以憎人欲殺之利在於人死故也凡此五疾獄刑之所以蕃也○按漢舊事斷獄報重常盡三冬之月後漢章帝改用冬初十月而已元和二年旱長水校尉賈宗上言以為斷獄不盡三冬陰氣微弱陽氣發洩故招致災旱帝下公卿議陳寵議曰夫冬至之節陽氣始萌故十一月有蘭射干芸荔之應

易通卦驗

曰十一月廣莫風至蘭射干生月令仲冬芸生荔挺出一陽始生天以為正周以為春

正春皆始十一月萬物微而未著天以為正周以為歲首十二月陽氣上通雉雊雞

乳地以為正殷以為春

十二月二陽又生雁北嚮陽氣上通諸生皆動萌芽月令季冬

雞雛

至正月陽氣以至天地以交萬物皆出蟄蟲始振

人以為正夏以為春

今正月也天子迎春東郊陰陽交合萬物皆出於地人始初見故曰

人以為正月令孟春天氣下降地氣上騰三微成著以

通三統

統者統一歲之事王者三統遞用周環無窮故曰通三統三禮義宗曰三微三正也十一月陽

氣始施萬物動於泉下微而未著其色皆赤陽氣故周以天正為歲色尚赤夜半為朔十二月萬物始芽色白白者陰氣故殷以地正為歲色尚白雞鳴為朔正月萬物始達其色皆黑人得加功以展其業夏以人正為歲色尚黑平旦為朔故曰三微王者奉以成之各法其一以改正朔也易乾鑿度曰三微而成著三著而成體

當此之時周以天元殷以地元夏以人元若以此時

行刑殷周歲首皆為流血不合人心不稽天意月令曰

孟冬之月趣刑獄無留罪

按月令及淮南子皆言季秋趣刑獄無留罪今言孟冬未

詳明大刑必在立冬也又仲冬之月身欲寧事欲靜月令

仲冬君子齊戒身欲寧事欲靜以待陰陽之定若以行刑不可謂寧靜也議者

或曰旱之所由咎在改律臣以為殷周斷獄不以三微

而化致康平無有災害自元和以前皆用三冬而水旱

之異往往為患由此言之災害自為他慮不以改律秦

為虐政四時行刑漢興蕭何草律季秋論囚

論決也

俱避

立春之月不計天地之正三王之春實頗有違帝納之
遂不復改時羣臣上言古者肉刑嚴重人畏法令今憲
律輕薄故姦宄不勝宜增禁科以防其源詔下公卿光
祿勳杜林奏曰夫人情挫辱則義節之風損法防繁多
則苟免之行興孔子曰道之以政齊之以刑民免而無
恥道之以德齊之以禮有恥且格古之明王深識遠慮
動居其厚不務多辟周之五刑不過三千大漢初興詳

覽得失故破矩為員斷雕為朴蠲除苛政更立疎網海
內歡忻人懷寬德及至其後漸以滋章吹毛求疵詆欺
無限桃茹之饋集以成賊事無妨於義以為大戮故國
無廉恥家無全行至於法不得禁止為弊彌深臣愚以
為宜如舊制不合翻移帝從之自建初中有人侮辱人
父者而其子殺之常貫其死刑而降宥之自後因以為
比是時遂定其議以為輕侮法和帝即位尚書張敏上
議曰夫輕侮之法先帝一切之恩不有成科班之律令

也夫死生之決宜從上下猶天之四時有生有殺若聞
容恕著為定法者則是故設姦萌生長罪隙孔子曰民
可使由之不可使知之春秋之義子不報讐非子也而
法令不為之減者以相殺之路不可開故也今托義者
得減謬殺者有差使執憲之吏得設巧詐非所以遵在
醜不爭之義又輕侮之比寢以繁滋至有四五百科轉
相瞻顧彌復增甚難以垂之萬載臣惟孔子垂經典臯
陶造法律原其本意皆欲禁人為非未曉輕侮之法將

以何禁必不能使不相輕侮而更開相殺之路議者或曰平法當先論生臣愚以為天地惟人為貴殺人者死三代通制今欲趣生反開殺路一人不死天下受弊語曰利一害百人去城郭夫春生秋殺天道之常春一物枯即為害秋一物榮即為異王者體天地順四時法聖人從輕律願陛下留意廣令評議天下幸甚從之○晉惠帝之代政出羣下每有疑獄各立私情刑法不定獄訟繁滋尚書裴頠表諫之曰夫天下之事多塗非一司

之所管中才之情易擾賴恒制而後定先王知其然也是以辯方分職為之准局准局既立各掌其務刑賞相稱輕重無二故下聽有常羣吏安業也舊宮掖陵廟有水火毀傷之變然後尚書乃躬自奔赴其非此也皆止於郎令史而已刑法所加各有常刑去元康四年大風之後廟闕屋瓦有數枚傾落免太常荀寓於時僉謂事輕責重有違於常會五年二月天有大風主者懲懼前事臣新拜尚書始三日本曹尚書有疾權令兼出按行

蘭臺主者乃瞻視阿棟之間求索瓦之不正者得棟上瓦小斜十五處或是始瓦時斜蓋不足者風起倉卒臺官吏往太常按行不及得周文書未至之頃便競相禁止復興刑獄昔漢時有盜高廟玉環者文帝欲族誅張釋之但處以死刑曰若侵長陵一抔土何以復加帝從之大晉垂制深惟經遠山陵不封園邑不飾墓而不墳同乎山壤是以丘坂存其陳草使齊乎中原矣雖陵兆尊嚴唯毀發然後族之此古典也若登踐犯損失盡敬

之道事止刑罪可也去年八月奴聽教加誣周龍燒草
廷尉遂奏族龍一門八口并命會龍獄翻然後得免考
之情理准之前訓所處實重今年八月陵上荆一枝圍
七寸二分者被斫司徒太常奔走道路雖知事小而按
劾難測騷擾驅馳各競負於今太常禁止未解近日太
祝署失火燒屋三間半署在廟北隔道在重墉之內火
即已滅主者便責尚書不即按行輒禁止尚書免皆在
法外刑書之文有限而舛違之故無方故有臨時議處

之制誠不能皆得循常也至於此輩皆為過當每相逼
迫不復以理上替聖朝畫一之德下損尊禮大臣之體
臣愚以為犯陵上草木不應乃用同產異刑之制按行
奏劾應有定准相承務重體例遂虧或因餘事得容淺
深顧雖有此表曲議猶不止劉頌為三公尚書又上疏
曰自近代以來法漸多門令甚不一臣職思其憂伏惟
陛下為政每盡善故事求曲當曲當則例不得直盡善
故法不得全何則夫法者固以盡理為當而上求盡善

則諸下牽文就義以赴主之所許是以法不得全刑盡徵文徵文必有乖於情聽之斷而上安於曲當故執平者因文可引則生二端是法多門令不一則吏不知所守下不知所避姦偽者因法之多門以售其情所欲淺深苟斷不一則居上者難以檢下於是事同議異獄犴不平有傷於法古人有言人主詳其政荒人主明其事理詳匪他求盡善則法傷故其政荒也明者輕重之當雖不厭情苟入無文則議而行之故其事理也理有窮

塞故使大臣釋滯事有時宜故人主權斷主者守文若
釋之執犯蹕之平也大臣釋滯若公孫弘斷郭解之獄
也人主權斷若漢主戮丁公之為也天下萬事自非斯
格不得出法以意妄議其餘皆以律令從事然後法信
於下人聽不惑吏不容姦可以言政人主軌斯格以責
羣下大臣小吏各守其局則法一矣古人有言善為政
者因人設教制法之謂也又曰隨時之宜當務之謂也
則因人隨時在大量也而制其法法軌既定則行之信

如四時執之堅如金石羣吏豈得在成制之內復稱隨時之宜傍引因人設教以亂政典哉何則始制之初固已因人而隨時矣今若設法未盡當則宜改之若謂已善不得盡以為制而使奉用之司公得出入以差輕重也人君所與天下共者法也已令四海不可以不信為教上古議事以制不為刑辟夏殷及周書法象魏三代之君齊聖然咸棄曲當之妙鑒而任徵文之直準非聖人有殊所遇異也今論時敦朴不及中古而執平者欲

適情之所安自托於議事以制臣竊以為聽言則美論
理則違然天下之大事務衆雜時有不得悉循文如令
故臣謂宜立格為限使主者守文死生以之不敢錯思
於成制之外以差輕重至如非常之斷出法賞罰若漢
祖戮楚臣之私已封趙氏之無功唯人主專之非奉職
之臣所得議擬然後情求旁請之跡絕似是而非之奏
塞此蓋齊法之大準也夫出法權制措施一事厭情合
聽可適耳目誠有臨時當意之快勝如徵文不允人心

也然起為經制終年施用恒得一而失十故小有所得者必大有所失近有所漏者必遠有所包故諳事識體者善權輕重不以小害大不以近妨遠忍曲當之近適以全簡直之大準不牽於凡聽之所安必守徵文以正例每臨其事恒御此心以決斷此又法之大槩也又律法斷罪皆當以法律令正文若無正文依附名例斷之其正文名例所不及皆勿論法吏以上所執不同得為異議如律之文守法之官唯當奉用律令至於法律之

內所見不同乃得為異議也今限法曹卽令史意有不
同為駁唯得論釋法律以正所斷不得援求諸外論隨
時之宜以明法官守局之分詔下其事侍中太宰汝南
王亮奏曰臣以去太康八年隨事異議且周懸象魏之
書漢詠畫一之法誠以法與時共議不可二臣以為宜
如頌所啟為永久之制於是門下屬議曰昔先王議事
以制自中古以來執法斷事既已立法誠不宜求法外
小善也若以善奪法則人逐善而不思法其害甚於無

法也按啟事欲令法令斷一事無二門郎令史以下應復出法駁按隨以事聞也○東晉成帝時廷尉奏殿中帳施吏邵廣盜官幔二張合布三十疋有司正刑棄市廣二子宗年十三雲年十一黃幡搥登聞鼓乞恩辭求自沒為奚官奴以贖父命尚書官朱映議以為天下之人無子者少一事遂行便成永制懼死罪之刑於此而弛時議者以廣為鉗徒二兒沒入既足以懲艾使百姓知父子之道聖朝有垂恩之仁可特聽減廣死罪為五

歲刑宗等付奚官為奴而不為永制尚書右丞范堅駁之曰自淳朴澆散刑辟乃作刑之所以止刑殺之所以止殺雖有時赦過宥罪議獄緩死未有行不忍而輕易典刑者也且既許宗等宥廣死罪若復有宗比而不求贖父命者豈不擯絕人倫同之禽獸邪按主者今奏云唯特聽宗等而不為永制臣以為王者之作動關盛衰頌笑之間尚慎所加今之所以宥廣正以宗等耳人之愛父孰不如宗今既許宗之請將來訴者何獨匪人特

聽之意未見其益不以為例交與怨讐此為施一恩於
今而開萬怨於後也從之安帝義熙中劉毅鎮姑熟常
出行而隰陵縣吏陳滿射鳥箭誤中直帥雖不傷人處
法棄市何承天議曰獄貴情斷疑則從輕昔有驚漢文
帝乘輿馬者張釋之斷以犯蹕罪止贖金何者明其無
心於驚馬也故不以乘輿之重而加異制今滿意在射
鳥非有心於中人按律誤過傷人三歲流刑況不傷乎

通典卷一百六十六

欽定四庫全書

通典卷一百六十七

唐 京兆杜佑君卿纂

刑五

雜議下

宋

梁

後魏

大唐

宋前廢帝景平中大司馬府軍人朱興妻周坐息男道符年三歲先得癰病周因其病發掘地埋之為道符姑雙女所告正周棄市刑司空徐羨之議曰自然之愛虎

狼猶仁周之凶忍宜加明戮臣以為法律之外故尚弘
通物理母之即刑由子伏法為子之道焉有自容之地
雖伏法者當罪而在育者匪宜愚謂可特屏之遐裔詔
從之文帝元嘉七年郟縣人黃初妻趙打息載妻王死
後遇赦王有父母及息男稱依法徙趙二千里司徒左
長史傅隆議曰禮律之興蓋本自然求之情理非從天
墮非從地出父子至親分形同氣稱之於載即載之於
趙雖云三代合之一體非有分者也稱雖創巨痛深固

無讐祖之義故古人不以父命辭王父命也若云稱可
殺趙當何以處載若父子孫祖互相殘戮俱非先王明
罰臯陶立法之本旨也向使石厚之子日磾之孫砥鋒
挺鍔不與二祖同戴天日則石碯絜侯何得純臣於國
孝義於家矣舊令云殺人父母徙二千里外不施父子
孫祖明矣趙當避王固當千里外耳令云凡流徙者同
籍親近欲相隨聽之此又大通情理因親以教愛者也
趙既流載為人子何得不從載行而稱不行豈名教所

許趙雖內愧終身沈痛沒齒孫祖之義自不得絕事理固然也孝武於元嘉中出鎮歷陽沈亮行參征虜將軍事人有盜發塚者有罪所近村人與符伍遭劫不赴救同坐亮議曰尋發塚之情事止竊盜徒以侵亡犯死故同之嚴科夫穿掘之侶必銜枚以晦其跡強劫之黨必謹呼以威其事故兇赫者易應潛密者難知且山原為無人之鄉丘壠非常途所踐至於防救不得比之村鄉督實劾名理與劫異則符伍之坐居宜降矣又結罰之

科雖有同符之限而無遠近之斷夫家無村甲當以比
近坐之若不域之以界則數步之內與千里之外便應
同罹其責防人之禁不可不慎夫止非之憲宜當其律
愚謂相去百步內赴告不時者一歲刑自此以外差不
及咎孔淵之大明中為尚書比部郎時安陸應城縣人
張江陵與妻吳共罵母黃忿恨自縊死遇赦律文子殺
傷毆父母梟首罵詈棄市婦謀殺夫之父母亦棄市遇
赦免刑補兵江陵罵母母以之自裁重於毆傷若同殺

科則疑重同毆傷及罵制則疑輕准制唯有傷於父母
遇赦猶梟首無罵母致死遇赦之科淵之議曰夫題里
逆心仁者不入名且惡之況乃人事故毆傷呪詛法所
不原詈之致死則理無可宥罪疑惟輕經文之旨非此
之謂江陵雖遇赦恩故合梟首婦本以義愛非支屬黃
之所恨情不在吳原死補兵有允正法詔如淵之議吳
興餘杭人薄道舉為刼制同籍周親補兵道舉從弟代
公道生等並為大功親非應在補謫之例法以代公等

母存為周親則子宜隨母補兵何承天議曰尋刼制同籍周親補兵大功不在此例婦人三從既嫁從夫夫死從子今道舉為刼若其叔尚在制應補謫妻子營居固其宜也但為刼之時叔父已歿代公道生並是從弟大功之親不合補謫今若以叔母為周親令代公隨母補兵既違大功不謫之制又失婦人三從之道由於主者守周親之文不辨男女之異遠嫌畏負以生此疑懼非聖朝恤刑之旨謂代公等母子並宜見原吳興武康縣

人王延祖為刼父睦以告官新制凡刼身斬刑家人棄市睦既自告於法有疑時尚書何叔度議曰設法止姦本於情理一人為非闔門應刑所以罪及同產欲開其相告以出造惡之身睦父子之際容可悉共逃亡而割其天屬還相縛送螫毒在手解腕求全於情可愍理亦宜宥使兇人不容於家逃刑無所乃大絕根源也睦既糺送則餘人無應復告並合赦之沛郡相縣唐賜往北村朱起彭家飲酒還得病吐蠱蟲十餘枚臨死語妻張

死後剜腹出病死後張手自破視五臟悉糜碎郡縣以
張忍行剗剖賜子副又不禁止事起赦前法不能決按
律傷死人四歲刑妻傷夫五歲刑子不孝父母棄市並
非科例三公郎劉勰議妻痛導往言兒識不及理考事
原心非存忍害謂宜哀矜吏部尚書顧凱之議曰法移
露尸猶為不道況在妻子而忍行凡人所不行不宜曲
通小情當大理為斷謂副不孝張同不道詔如凱之議
也○梁武帝天監三年建康女子任提女坐誘口當死

召其子景慈對鞠辭云母實行此是時法官虞僧虬啓
按子之事親有隱無犯直躬證父仲尼為非景慈素無
防閑之道死有明目之據陷親極刑傷和損俗凡乞鞠
不審降罪一等豈得避五歲之刑忽死母之命景慈宜
加罪辟詔流於交州○後魏宣武帝景明中冀州人費
羌皮母亡家貧無以葬賣七歲女子與張迴為婢迴轉
賣與梁之定而不言狀按律掠人和賣為奴婢者死迴
故買羌皮女謀以轉賣依律處絞刑詔曰律稱和買人

者死謂兩人詐取他財也羗皮賣女告迴稱良張迴利
賤知良公買誠於律俱乖而各非詐然迴轉賣之日應
有遲疑而決從真賣於情固可處絞刑三公郎中崔鴻
議曰按律賣子一歲刑五服內親屬在尊長者死賣周
親及妾與子婦者流蓋天性難奪支屬易遺又尊卑不
同故殊以死刑且買者於彼無天性支屬罪應一例明
知是良決便真賣因此流漂家人不知追贖無跡永沈
賤隸按其罪狀與掠無異太保高陽王雍議曰檢迴所

買保證明然處以和掠實為乖當律云謀殺人而發覺者流從五歲刑已傷及殺而還蘇者死從者流已殺者斬從而加功者死不加功者流詳沈賤之與身死流漂之與腐骨一存一亡為害孰甚然賊律殺人有首從之分盜人買賣無唱和差等謀殺之與和掠同是良人應為准例所以不引殺人減之降從強盜之一科縱令謀殺之與強盜俱得為例而以從輕其義安在又云知人掠盜之物而故買者以隨從論此明禁暴掠之源遏姦

盜之本非謂買之於親尊之手而同之於盜掠之僭竊
謂五服相賣俱是良人所以容有差等之罪者明去掠
盜理遠故從親疎為差級尊卑為輕重依律諸共犯罪
者皆以發意為首明買賣之先有由魁末之坐宜定若
羌皮不云賣則迴無買心則羌皮為首迴為從可也且
既一為婢賣與不賣俱非良人何必以不賣為可原轉
鬻為難恕張迴之僭宜鞭一百賣子葬親誠孝可美而
表賞之議未加刑罰之科已及恐非敦風化之謂詔曰

羌皮賣女葬母孝誠可嘉便可特原張廻雖買之於父
母不應轉賣可刑五歲先是皇族有譴皆不特訊時有
宗士元顯富犯罪須鞠宗正約以舊制尚書李平奏以
帝宗磐石周布天下其屬籍踈遠蔭官卑末無良犯憲
理須推究請立限斷以為定式上詔曰雲來綿遠繁衍
代滋植籍宗氏而為不善者良亦多矣先朝既無不訊
之格而空相矯恃以長為暴諸在議請之外可依常法
河東郡人李憐坐行毒藥按以死坐其母訴稱一身年

老更無周親例合上請檢籍不謬及憐母身亡州斷三年服終後乃行決主簿李陽駁曰按法例律諸犯罪若祖父母父母年七十以上無成人子孫旁無周親者具狀上請流者鞭笞留養其親終則從流不在原赦之例且李憐既懷酖毒之心母在猶闔門投舁況今已死給假殯葬足示仁寬不合更延可依處斬流其妻子詔從之神龜中蘭陵公主駙馬都尉劉輝坐與河陰縣人張智壽妹容妃陳慶和妹惠猛姦亂毆主傷胎遂逃門下

處奏容妃惠猛各入死刑智壽慶和並以知情不加限
防處以流坐詔曰容妃惠猛怒死髡鞭付宮餘如秦崔
纂執曰伏見旨募若獲輝者職人賞二階白人聽出身
進一階廝役免役奴婢為良按輝無叛逆之罪未可募
同反者王者理天下不為喜怒增減不由親疎改易按
鬪律祖父母父母忿怒以兵刃殺子孫者五歲刑毆殺
及愛憎而故殺者各加一等雖王姬下降貴殊常妻然
人婦之孕不得非子又依永平四年先朝舊格諸刑流

及死律者皆首未判定然後處決且事必因本若以輝
逃避便應懸募未有捨其首罪而成其末愆容妃等罪
止姦私律處不越刑坐何得同宮掖之罪齊奚官之役
按智壽口訴妹已適人已生二女是他家之母他人之
妻昔魏晉未除五族之刑有免于戮母之坐謂在室之
女從父母之刑已醮之婦從夫家之戮律許周親相隱
況姦私之醜豈得使同氣證之按律姦罪無相緣之坐
不可因失輝之愆加兄弟之刑夫刑人於市與衆棄之

爵人於朝與衆共之明不私於天下也右僕射游肇及奏如纂言詔曰輝悖法亂理罪不可縱厚賞懸募必冀擒獲容妃惠猛與輝私亂因此耽惑主致非常此而不誅將何懲肅智壽慶和初不防禁招引劉輝共成淫醜敗風穢化豈得同於常人且古有詔獄寧復一歸大理而尚書理本納言所屬弗究悖法之淺深不詳損化之多少有辜執憲殊乖任寄崔纂可免郎都官尚書悉奪祿一秩○大唐律曰八議

具刑制下篇

諸疑獄法官執見不

同者得為異議不得過三貞觀十四年尚書左丞韋悰
勾司農木橦七十價百姓者四十價奏其乾没上令大
理卿孫伏伽亟書司農罪伏伽曰司農無罪上驚問之
伏伽曰只為官木橦貴所以百姓者賤向使官木橦賤
百姓者無由而賤矣但見司農識大體而不知其過上
乃悟顧謂韋悰曰卿識用不逮伏伽遠矣遂罷司農罪
二十一年刑部奏言准律謀反大逆父子皆死兄弟處
流此則輕而不懲望請改重法制遣百官詳議司議郎

敬播議曰昆弟孔懷人倫雖重比於父子情理有殊生有異室之文死有別宗之義今有高官重爵本蔭唯逮子孫胙土析珪餘光不及昆季豈有不霑其蔭輒受其辜背理違情恐為太甚必其反茲春令鍾彼秋荼創刻骨於道德之人逮深文於刑措之日臣將不可物論誰宜詔從之永徽二年七月華州刺史蕭齡之前任廣州都督受左智遠及馮益妻等金銀奴婢詔付羣臣議奏上怒令於朝堂處置御史大夫唐臨奏曰臣聞國家大

典在於刑賞古先聖王惟刑是恤今天下太平合用堯舜之典比來有司多行重法叙勲必須刻削論罪務從重科非是憎惡前人止欲自為身計今議齡之事有輕有重重者至流死輕者除名以齡之受委大藩贓罰狼藉原情取事死有餘辜然既遣詳議終須近法臣竊以律有八議並依周禮舊文務其異於衆臣所以特制議法禮王族刑於僻處所以議親刑不上大夫所以議貴明知重其親貴議欲緩刑非嫉其賢能謀致深法今議

官必於常法之外議令入重正與堯舜相反不可為萬
代法臣既處法官敢不以聞詔遂配流嶺南神龍元年
正月趙冬曦上書曰臣聞夫今之律者乃有千餘條近
有隋之姦臣將弄其法故著律曰犯罪而律無正條者
應出罪則舉重以明輕應入罪則舉輕以明重立夫一
言而廢其數百條自是迄今竟無刊革遂使生死罔由
乎法律輕重必因乎愛憎賞罰者不知其然舉事者不
知其犯臣恐賈誼見之必為痛哭焉夫立法者貴乎下

人盡知則天下不敢犯耳何必飾其文義簡其科條哉
夫條科省則下人難知文義深則法吏得便下人難知
則暗陷機穽矣安得無犯法之人哉法吏得便則比附
而用之矣安得無弄法之臣哉臣請律例格式復更刊
定其科條言罪直書其事無假飾文其以准加減比附
原情復舉輕以明重不應為而為之類皆勿用之使愚
夫愚婦聞之必悟則相率而遠之亦安肯知而故犯哉
苟有犯者雖貴必坐則宇宙之內肅然咸服矣故曰法

明則人信法一則主尊書刑期于無刑誠哉是言開元十年十一月前廣州都督裴旻先下獄中書令張嘉貞奏請決杖兵部尚書張說進曰臣聞刑不上大夫以其近於君也故曰士可殺不可辱臣今秋巡邊中途聞姜皎朝堂決杖流皎是三品亦有微功不宜決杖廷尉以卒伍待之且律有八議勲貴在焉今旻先不可輕行決罰上然其言嘉貞不悅退而謂說曰何言事之深也說曰宰相者時來則為豈能長據若貴臣盡當可杖但恐

吾等行當及之此言非為佻先乃為天下士君子也

通典卷一百六十七

欽定四庫全書

通典卷一百六十八

唐 京兆杜佑 君卿纂

刑六

肉刑議

漢

後漢

魏

晉

東晉

漢文帝十三年齊太倉令淳于意有罪逮繫長安當刑其女緹縈上書曰妾父為吏齊中皆稱廉平今坐法當刑妾痛死者不可復生刑者不可復屬

屬聯也之欲反

雖欲改

過自新其道無繇妾願沒入為官婢贖父刑罪天子悲
憐其意遂下令曰蓋聞有虞氏之時畫衣冠異章服以
為戮而人弗犯今法有肉刑三

黥劓二左
右趾一

而姦不止吾

甚自媿夫訓道不純愚人陷焉詩曰愷悌君子民之父
母今刑者斷支體刻肌膚終身不息

息生也

或欲改行為

善而道無繇豈稱為民父母之意哉其除肉刑丞相張
蒼御史大夫馮敬奏議定律令諸髡者完為城旦春當
黥者髡鉗為城旦春當劓者答三百當斬左趾者答五

百具刑制上篇

○班固曰善乎孫卿之論曰時俗之為說者

以為治古無肉刑

治古為上古至治之時

有象刑墨黥之屬菲履

赭衣而不純

菲草履也純緣也衣不加緣示有耻也菲扶味反純之允反

是不然矣

以為治古則人莫觸罪邪豈獨無肉刑哉亦不待象刑

矣

人不犯法則以象刑無所施

為人或觸罪戾而直輕其刑是殺人

不死而傷人者不刑也罪至重而刑至輕人無所畏亂

莫大焉凡制刑之本將以禁暴惡以懲其末也

懲止也

殺

人者不死傷人者不刑是惠暴而寬惡也故象刑非生

於治古方起於亂今也

古無象刑也所以有象刑之言者近起今人惡刑之重故遠推

治古之聖君但以象刑而天下自理也

凡爵列官職賞慶刑罰皆以類相

從者也一物失稱亂之端也

稱宜也

德不稱位能不稱官

賞不當功刑不當罪不祥莫大焉夫征暴誅悖治之威

也殺人者死傷人者刑是百王之所同未有知其所由

來者也故治則刑重亂則刑輕

代所以治者乃刑重也所以亂者乃刑輕也

犯治之罪固重犯亂之罪固輕也書云刑罰世輕世重

此之謂也

周書甫刑之辭也刑罰輕重各隨其時

所謂象刑惟明者言象

天道而作刑

虞書益稷曰咎繇方祗厥叙方施象刑惟明言敬其次序施用刑法皆明白也

又

安有菲履赭衣者哉孫卿之言既然又因俗說而論之

曰禹承堯舜之後自以德衰而制肉刑湯武順而行之

者以俗薄於唐虞故也今漢承哀周暴秦極弊之流俗

已薄於三代而行堯舜之制是猶以鞭而御驛突

鞭驛突也

繩縛馬曰鞭驛突惡馬也馬絡頭曰羈

違救時之宜矣且除肉刑者本欲

以全民也今去髡鉗一等轉而入於大辟以死罔民失

本惠矣

罔謂羅網

故死者歲以萬數刑重之所致也至乎穿

寤之盜忿怒傷人男女淫佚

逸同

吏為姦職若此之惡髡

鉗之罰又不足以懲也故刑者歲十數萬民既不畏又

曾不耻刑輕之所生也故俗之能吏公以殺盜為威專

殺者勝任奉法者不治亂名傷制不可勝條是以罔密

而姦不塞刑蕃而人愈慢

塞止也蕃多也音扶元反慢與慢同

必世而未

仁百年而不勝殘誠以禮樂闕而刑不正也然則惟思

所以清源正本之意刪定律令

纂音撰

二百章以應大辟

其餘罪次於古當生今獨死者皆可募行肉刑

欲死邪欲腐邪

及傷人與盜吏受賕枉法男女淫亂皆復古刑為三千

章詆欺文致微細之法悉蠲除

詆毀誣也
丁禮反

如此則刑可

畏而禁易避吏不專殺法無二門輕重當罪民命得全

合刑罪之中殷天人之和

殷亦中也

順稽古之制成時雍之

化矣○後漢獻帝之時天下既亂刑法不足以懲罪於

是名儒大才崔實鄭玄陳紀之徒咸以為宜復肉刑及

曹公下令荀彧博訪百官欲復申之少府孔融議以為

古者俗龐善否區別吏端刑清政無過失百姓有罪皆

自取之末代凌遲風化壞亂政撓其俗法害其教故曰
上失其道民散久矣而欲繩之以古刑投之以殘棄非
所謂以時消息者也紂斲朝涉之脛天下謂之無道九
牧之地千八百君若各刑一人是天下常有千八百紂
也求俗休和弗可得已且被刑之人慮不全生志在必
死類多趨惡莫復歸正風沙亂齊伊戾禍宋趙高英布
為世大患不能止人不為非也適足絕人還為善耳雖
忠如鬻拳信如卞和智如孫臏冤如荅伯才如史遷達

如子政一罹刀鋸沒世不齒是太甲之思庸穆公之霸秦南睢之骨立衛武之初筵陳湯之都賴魏尚之守邊無所復施也漢開改惡之路凡為此故明德之君遠度深惟棄短就長不苟革其政者也朝廷善之卒不改焉

○魏武秉漢政下令又欲復肉刑御史中丞陳羣深陳其便相國鍾繇亦贊成之王循等不同其議魏武亦難以藩國改漢朝之制遂不行至齊王芳正始中征西將軍夏侯玄河南尹李勝又議肉刑竟不能決夏侯太初

著論曰夫天地之性人物之道豈自然當有犯何荀班
論曰治則刑重亂則刑輕又曰殺人者刑是百王之所
同也夫死刑者殺妖逆也傷人者不改是亦妖逆之類
也如其可改則無取於肉刑也如亡死刑過制生刑易
犯罪次於古當生今獨死者皆可募行肉刑及傷與盜
吏受贓枉法男女淫亂死者皆復古刑斯罔之於死則
陷之肉刑矣舍死折骸又何辜邪猶稱以滿堂聚飲而
有一人向隅而泣者則一堂為之不樂此亦願理其平

而必以肉刑施之是仁於當殺而忍於斷割懼於易死而安於為暴哀泣奚由而息堂上焉得泰邪仲尼曰既富且教又曰苟子之不欲雖賞之不竊何用斷截乎下愚不移以惡自終所謂剪妖也若饑寒流溝壑雖大辟不能制也而况肉刑哉赭衣滿道有鼻者醜終無益矣李勝曰且肉刑之作乃自上古書載五刑有服又曰天討有罪而五刑五用哉割剝之屬也周官之制亦著五刑歷三代經至治周公行之孔子不議也今諸議者惟

以斷截為虐豈不輕於死亡邪云妖逆是剪以除大災
此明主治世之不能無也夫殺之與刑皆非天地自然
之理不得已而用之也傷人者不改則剗剗何以改之
何為疾其不改便當陷之於死地乎妖逆者懲之而已
豈必除之邪刑一人而戒千萬人何取一人之能改哉
盜斷其足淫而宮之雖欲不改復安所施而全其命懲
其心何傷於大德今有弱子罪當大辟問其慈父必請
其肉刑代之矣慈父猶施之於弱子況君加之百姓哉

且蝮蛇螫手則壯士斷其腕系蹄在足則猛獸絕其蹄

扶元反

蓋毀支而全生也夫一人哀泣一堂為之不樂此

言殺戮者之不當也何事於肉刑之間哉赭衣滿道有
鼻者醜此時也長城之役死者相繼六經之儒填谷滿
坑何恤於鼻之好醜乎此吾子故猶哀刑而不悼死也
夏侯答曰聖賢之治世也能使民遷善而自新故易曰
小懲而大戒陷夫死者不戒者也能懲戒則無刻截刻
截則不得反善矣李又曰易曰屨校滅趾無咎仲尼解

曰小懲而大戒此小人之福也滅趾謂去足為小人懲明矣夏侯答曰暴之取死此自然也傷人不改縱暴滋多殺之可也傷人而能改悔則豈須肉刑而後止哉殺人以除暴自然理也斷截之政末流之所云耳孔少府曰殺人無所斫人有小瘡故刖趾不可以報施而髡不足以償傷傷人一寸而斷其支體為罰已重不厭衆心也李又曰暴之取死亦有由來非自然也傷人不改亦治道未洽而輕刑不足以大戒若刑之與殺俱非自然

而刑輕於殺何云殘酷哉夫刖趾不可報施誠然髡輸
固不足以償傷傷人一寸而斷其支體為罪已重夷人
之面截其手足其以髡輸償之不亦輕乎但慮其重不
惟其輕不其偏哉孔氏之論恐未足為雅論也

凡往復十六文

多不載

丁謚又論曰堯典曰象以典刑流宥五刑鞭作官

刑扑作教刑金作贖刑箠肆赦怙終賊刑咎繇曰天
討有罪五刑五用哉呂刑曰昔蚩尤惟始作亂延及于
平民罔不冠賊鵩義姦宄寇攘矯虔苗民弗用靈惟作

五虐之刑曰法殺戮無辜爰始淫為劓刵桮黥按此肉刑在於蚩尤之代而堯舜以流放代之故黥劓之文不載唐虞之籍而五刑之數亦不具於聖人之旨也禹承舜禪與堯同治必不釋二聖而遠則兇頑固可知矣湯武之王獨將奚取於呂侯故叔向云三辟之興皆叔世也此則近君子有徵之言矣○晉武帝初廷尉劉頌上言曰臣昔上行肉刑竊以為議者徇孝文之小仁而輕違聖王之典刑未詳之甚莫過於此今死刑重故非命

者衆生刑輕故罪不禁姦所以然者肉刑不用之所致也今為徒者類性元惡不軌之族也去家懸遠作役山谷饑寒切身志不聊生雖有廉士介者苟慮不首死則皆為盜賊豈況本性姦頑無賴之徒乎又今徒富者輸財計日歸家乃無役之人也貧者起於姦盜又不制之虜也不刑則罪無所禁不制則羣惡橫肆為法若此道不盡善也古者用刑以止刑今反於此諸重犯亡者髮過三寸輒重髡之此以刑生刑也加作一歲此以徒生

徒也亡者積多繫囚猥畜議者曰囚不可不赦從而赦之此為刑不制罪法不勝姦下知法之不勝相聚而謀為不軌月異而歲不同故自頃年以來姦惡陵暴所在充斥議者不深思此故而曰肉刑於名忤聽忤聽孰與賊盜不禁聖王之制肉刑遠有深理其事可得而言非徒懲其畏剝割之痛而不為也乃去其為惡之具使夫姦人無用復肆其志止姦絕本理之盡也亡者刑足無所用復亡盜者截手無所用復盜淫者割其勢理亦如

之除惡塞源莫善於此非徒然也此等已刑之後便各歸家父母妻子共相養恤不流離於道路有今之困瘡愈可役上准古制隨宜業作雖已刑殘不為虛棄而所患都塞又生育繁阜之道自若也今宜取死刑之限輕及三犯逃亡淫盜悉以肉刑代之其三歲刑以下已自杖罰遣又宜制其罰數使有常限不得減此其有宜重者又任之官長應四五歲刑者皆髡笞笞至一百稍行使各有差悉不復居作然後刑不復生刑徒不復生徒

而殘體為戮終身作戒人見其痛畏而不犯必數倍於
今且為惡者隨發被刑去其為惡之具此為已刑者皆
非良士也豈與全其為姦之手足而跣居必死之窮地
同哉而猶曰肉刑不可用臣竊以為不識時務之甚也
周禮三赦三宥施於老幼悼耄黔黎不屬逮者此非為
惡之所出故刑法逆舍而宥之至於自非此族犯罪則
必刑而無赦此政之理也暨至後代以時險多難因赦
解結權而行之又不以寬罪人也而今恒以罪積獄繁

赦以散之是以赦愈數而獄愈塞如此不已將至不勝
原其所由肉刑不用之故也今行肉刑非徒不積且為
惡無具則姦息去此二端獄不得繁故無取於數赦於
政體勝矣疏上不見省○東晉元帝即位廷尉衛展上
言古者肉刑事經前聖漢文除之加增大辟今人戶凋
荒百不遺一而刑法峻重非句踐養胎之義也詔內外
通議於是王導等議以肉刑之典由來尚矣肇自古先
以及三代聖哲明王所未曾改也豈是漢文常主所能

易者乎時蕭曹已沒絳灌之徒不能正其義逮班固深論其事以為外張輕刑之名內實殺人又死刑太重生刑太輕生刑縱於上死刑怨於下輕重不當故刑政不中也且原先王之造刑也非以過怒也非以殘人也所以救姦所以當罪今盜者竊人之財淫者好人之色亡者避叛之役皆無殺害也則之以刑刑之則止而加之斬戮戮過其罪死不可生縱虐於此歲以巨計此乃仁人君子所不忍聞而況行之於政乎或者乃曰死猶不

可懲而況於刑然眚者冥也其至愚矣雖加斬戮忽為
灰土死事日往生欲日存未以為改若刑諸市朝朝夕
鑒戒刑者思為惡之永痛惡者覩殘刑之長廢故足懼
也然後知先王之輕刑以御物明誠以懲愚其理遠矣
尚書令刁協等議以今中興崇祚大命惟新誠宜設肉
刑寬法以育人然懼羣小愚蔽習玩所見而忽異聞或
未能咸服愚謂行刑之時先明申法令樂刑者刑甘死
者殺則心服矣古典刑不上大夫今士人有犯者謂宜

如舊不在刑例則進退為允尚書周顥等議以為復肉刑以代死是誠帝王之至德哀矜之弘覆然竊以為刑罰之輕重隨時而作時人少罪而易威則從而寬之時人多罪而難威則宜死刑而濟之肉刑平代所應立非救弊之宜也方今聖化草創人有餘姦習惡之徒為非未已截頭絞頸尚不能禁而乃更斷足劓鼻輕其刑罰使欲為惡者輕犯官刑陷罪更衆是為輕其刑誘人於罪殘其身以加楚毒也昔之畏死刑以為善人者今皆

犯輕刑而殘其身畏重之常人反為犯輕而致因此何
異斷刑常人以為恩仁也恐受刑轉廣而為非者日多
踊貴屨賤有鼻者醜也徒有輕刑之名而實開長惡之
源不如殺以制殺重以全輕權小停之須聖化漸著兆
庶易感之日徐施行也議奏元帝猶欲從展所上大將
軍王敦以為百姓習俗日久忽復肉刑必駭遠近且逆
寇未殄不宜有慘酷之聲以聞天下於是乃止安帝元
興末桓玄輔政又議欲復肉刑斬左右趾之法以輕死

刑命百官議蔡廓上議曰肉刑之設肇自哲王蓋由曩
代風淳人謹圖象既陳則機心遂戢刑人在塗則不逞
改操故能勝殘去殺化崇無為季末澆偽設網彌密利
巧之懷日滋耻畏之情轉寡終身劇殺不足止姦況乎
黥劓豈能反善徒有酸悛之聲而無濟俗之益至於棄
市之條實非不赦之罪事非手殺考律同歸輕重均科
減降路塞鍾陳以之抗言元皇所為留愍今英輔翼贊
道邈伊周誠宜明慎用刑愛人弘育申哀矜以革濫移

大辟於肢體全性命之至重恢繁息於將來而孔琳之
議不同時王朗夏侯玄論多與琳合故遂不行

詳讞

周

漢

魏

晉

周易噬嗑卦雷電噬嗑先王以明罰勅法又賁卦曰山
下有火賁君子以明庶政無敢折獄又豐卦曰雷電皆
至豐君子以折獄致刑禮記王制曰刑者侓也侓者成
也一成而不可變故君子盡心焉

變更也

周西伯立有明

德時諸侯有獄皆請決焉虞芮有爭田者久不能決乃

來求平及入周見耕者讓畔少者讓長皆慚而返兩棄

其田周官司寇以兩造禁民訟入束矢於朝然後聽之

訟謂以財貨相告者也造至也使訟者兩至入束矢乃理之也不至不入束矢則是自服不直者也必入矢者

取其直也造音糙以兩劑禁民獄入鈞金三日致於朝然後聽

之獄謂相告以罪名者也劑今券書也獄者各取券書入鈞金又三日乃理之重刑也不券書不入金則是

自服不直者也必入金以三刺斷庶民獄訟之中中謂者取其堅三十斤為鈞以三刺斷庶民獄訟之中罪正

所定一曰訊羣臣二曰訊羣吏三曰訊萬民刺殺也三訊罪定則殺之

訊言聽民之所刺宥以施上服下服之刑宥寬也人言殺殺之言寬

寬之上服剗墨也下服剗刑也又以五聲聽獄訟求民情一曰辭聽觀其

出言不煩二曰色聽觀其顏色三曰氣聽觀其氣息四曰

耳聽觀其耳聆五曰目聽觀其眸子凡聽五刑之訟

必原父子之親君臣之義以權之權意論輕重之序慎

測淺深之量以別之意念也淺深俱有罪本心有善惡悉其聰明致其

忠愛以盡之疑獄汎與衆共之衆疑赦之必察小大之

比以成之小大猶輕重也成獄辭史以獄成告於正正

聽之史司寇吏也正如周禮鄉正以獄成告於大司寇

史司寇吏也正如周禮鄉師之屬漢有廷平秦置丞

大司寇聽之棘木之下

周禮鄉師之屬辯其獄訟異其死刑之罪而要之職聽於朝司

寇聽之朝王之外朝也左九棘孤卿大夫位焉右九棘公侯伯子男位焉面三槐三公之位

大司寇

以獄之成告於王王命三公參聽之

王使三公復與司寇及正共之重刑

也周禮王欲免之乃命三公會其期也

三公以獄之成告於王王三宥然

後制刑

宥寬也一宥曰不識二宥曰過失三宥曰遺忘

穆王作呂刑曰兩造具

備師聽五辭

兩謂囚證造至也兩至其備則衆獄官共聽之辭入五刑之辭

五辭簡孚

正於五刑

五辭簡核信有罪驗則正之於五刑

五刑弗簡正於五罰

不簡核謂

不應五刑當正五罰出金以贖

五罰弗服正於五過

不服不應罰正五於五過從赦免

過之疵惟官惟反惟內惟貨惟來

五過之所病或嘗同官位或反囚辭或內

親用事或行貨枉法或舊相往來皆病所在

其罪惟均其審克之

以病所在出入人罪

所在五過罪與犯決者同其審察之能使之不行

孔子曰君子之於人也有其

語也無不聽者皇於聽獄乎

皇猶況也

必盡其辭矣又曰聽

獄者或從其情或從其辭又曰聽獄之術三理必寬寬

之術歸於察察之術歸於義是故聽而不寬是亂也寬

而不察是慢也又曰今之聽人者求所以殺之古之聽

人者求所以生之不得其所以生之乃刑殺焉○漢高

帝詔曰獄之疑者吏或不敢決使有罪不論無罪久繫自今以後獄疑者各讞所屬二千石官以罪名當報之

當為處斷
讞亦議也

皆移廷尉廷尉不能決具為奏附所當比律

令以聞景帝中五年詔曰獄者人之大命死者不可復生吏或不奉法以貨賂為市朋黨比周以苛為察以刻為明有罪者不伏罪姦法為暴甚無謂也諸獄疑若雖文致於法而人心不厭者則讞之

厭服也

後元初詔曰獄

重事也人有智愚官有上下獄疑者讞有司有司所不

能決移廷尉有令讞而後不當讞者不為失

假令讞訖其理不當

所讞之人不為罪失

欲令理獄官務先寬自此獄刑益詳近於五

聽三省之意宣帝置廷平員四人使平刑獄○魏廷尉

高柔時護軍營士竇禮近出不還營以為亡表言逐捕

沒其妻盈及男女為官奴婢盈連至州府稱冤自訴莫

有省者乃辭詣廷尉柔問曰汝何以知夫不亡盈垂涕

泣對曰夫少單特養一老嫗為母事甚恭謹又哀兒女

撫視不離非是輕狡不顧室家者柔重問曰汝夫不與

人有讐乎對曰夫良善與人無讐又曰汝夫不與人交
錢財乎對曰嘗出錢與同營士焦子文求不得時子適
坐小事繫獄柔乃見子問所坐言次曰汝頗曾舉人錢
否子曰自以單貧初不敢舉人物也柔察子色動遂曰
汝舉竇禮錢何言不耶子怪知事露應對不次柔曰汝
殺禮便宜早伏子廼叩頭具首殺禮本末埋藏處所柔
便遣吏卒承子辭往掘得其屍詔書復盈母子為平人
班下天下以為體式○吳孫權太子登出遊時有彈丸

飛過左右往捕得一人挾彈懷丸抗言實不放彈左右
請付法登即使求過丸比之非類乃釋之孫亮出西苑
食生梅使黃門至中藏取蜜漬梅蜜中有鼠矢召問藏
吏藏吏叩頭亮問吏黃門從汝求蜜邪吏曰向求實不
敢與黃門不伏侍中刁元張郃啟黃門藏吏辭語不同
請付獄推鞠亮曰此易知耳令破鼠矢裏燥必是黃門
所為黃門首服左右莫不驚悚○晉陸雲為浚儀令雲
到官肅然下不能欺市無二價人有見殺者主名不立

雲錄其妻而無所問十餘日遣去密令人隨後伺之謂
曰不出行十里當有男子候之與語便縛來既而果然
問之具服云與此妻通共殺其夫聞妻得出欲與語憚
近縣故遠相邀於是一邑稱為神明

決斷

漢

後漢

漢沛縣有富家翁貲三千餘萬小婦子年纔數歲頃失
其母父無親近其女不賢翁病因思念恐爭其財兒必
不全因呼族人為遺書令悉以財屬女但遺一劍云兒

年十五以還付之其後女不肯與兒詣郡自言求劍時
太守何武得其條辭因錄其女及壻省其手書顧謂掾
吏女性強梁壻復貪鄙畏殘害其兒又計小兒得此財
不能全護故且與女實寄之耳不當以劍與之夫劍者
所以斷決限年十五者智力足以自居度此女壻必不
復還其劍當聞縣官縣官或能證察得見申展此凡庸
何能思慮弘遠如是哉悉奪取財以與子曰蔽女惡壻
溫飽十歲亦以幸矣論者大服武又漢時臨淮有一人

持足縑到市賣之道遇雨披戴後人來共庇陰雨霽當別因共爭鬪各云我縑詣府自言太守薛宣核實良久人莫肯首服宣曰縑值數百錢何足紛紜自致縣官呼騎吏中斷人各與半使人聽之後人曰受恩前操之而縑主稱怨宣曰然固知其當爾也因詰責之具服悉畀本主○後漢鍾離意為會稽北部督郵有烏程男子孫常與弟並分居各得田十頃並死歲饑常稍稍以米粟給並妻子輒追計直作券沒取其田並兒長大訟常掾

史議皆曰孫並兒遭饑賴常升合以長成人而更爭訟
非順遜也意獨曰常身為父遺當撫孤弱是人道正義
而稍以升合券取其田懷挾姦詭貪利忘義並妻子雖
以田與常困迫之至非私家也請奪常田畀並妻子衆
議為允謝夷吾為荊州刺史行部到南陽縣遇章帝巡
狩幸南陽有詔勅夷吾入傳錄見囚徒勿廢舊儀上臨
西廂南面夷吾處東廂分帷於其中夷吾首錄囚徒有
亭長姦部人者縣言和姦上意以為長吏以劫人而得

言和目觀刺史決當云何須吏夷吾呵之曰亭長職在
禁姦今為惡之端何得言和切讓三老孝悌免長吏之
官理亭長罪帝善之

考訊附

大唐

大唐律諸審獄之官先備五聽又驗諸證信事狀疑似
猶不首實者然後拷掠每訊相去二十日若訊未畢更
移他司仍須拷鞠者

相移他司者連寫本案俱移

則通計前訊以充

三度即罪重害及疑似處少不必皆須滿三者因因訊

致死者皆須申牒當處長官與糾彈官對驗○諸拷囚不得過三度類總不過二百杖罪以下不得過所犯之數拷滿不承保取放之若拷滿三度及杖外以他法拷掠者杖一百數過者反坐所剩以故致死者徒二年即有瘡痛不待差而拷者亦杖一百若決杖笞者笞五十以故致死者徒一年半若依法拷決邂逅致死者勿論仍令長官等勘驗違者杖六十

拷決之失立案不立案等

○諸拷囚

被水

火損敗亦同

拷滿不首取保並故違者以故失論○諸赦前

當罪不斷者若處輕為重宜改從輕處重為輕即從輕

法其有常赦所不免者依常律

常赦所不免謂雖會大赦猶處死及流若除名

免所居反移鄉者赦書定罪名合從輕者不得引律比附入重違者各以故失論

○諸犯罪在

市杖以下市決之應合陰贖及徒以上送縣其在京市

非京兆府並送大理寺

駕幸之處亦准此

諸決大辟罪在京者

行決之司五覆奏在外府刑部三覆奏

在京者決前一日二覆奏決日

三覆奏在外者初日一覆奏後日再覆奏縱臨時有勅不許覆奏亦准此覆奏

若犯惡逆以上

及部曲奴婢殺主者唯一覆奏其京城及駕在所決囚
日尚食進蔬食內教坊及太常寺並停音樂○諸決大
辟罪皆防援至刑所囚一人防援二十人每一囚加五
人五品以上聽乘車並官給酒食聽親故辭訣宣告犯
狀皆日未後乃行刑

犯惡逆以上不在乘車之限決經宿所司即為埋瘞若有親故亦任

已瘞之

即囚身在外者奏報之日不得驛馳行下○諸決

大辟罪官爵五品以上在京者大理正監在外者上佐
監決餘並判官監決從立春至秋分不得奏決死刑若

犯惡逆以上及奴婢部曲殺主者不拘此令在京決死
囚不拘此皆令御史金吾監決若囚有冤枉灼然者停

決聞奏○諸囚死無親戚者皆給棺於官地內權殯其棺

在京者將作造供在外者用官物給若犯惡逆以上不
給官地去京七里外量給一頃以下擬埋諸司死囚隸

大理檢校置塋銘於塋內立牓於上書其姓名仍下本屬告

家人令取即流移人在路及流所徒在役死者亦准此

○諸枷長五尺以上六尺以下頰長二尺五寸以上六

寸以下共濶尺四寸以上六寸以下徑三寸以上四寸

以下柎長六寸以上二尺以下濶三寸厚一寸鉗重八兩以上一斤以下長一尺以上一尺五寸以下鏃長八尺以上丈五尺以下諸杖皆削去節目長三尺五寸訊囚杖大頭三分二釐小頭二分二釐常行杖大頭二分七釐小頭一分七釐笞杖大頭二分小頭一分半其決笞者腿分受決杖者背腿臀分受須數等考訊者亦同笞以下願腿背均受者聽即殿廷決者皆背受

通典卷一百六十八